



Sumáriu Kazu: 2013

Periódú Jullu 2013

Sumáriu prosesu julgamentu kazu iha Tribunál Distritál Baucau

Introdusaun

Iha fulan Jullu 2013, JSMP kontinua monitoriza prosesu julgamentu kazu krime 18 iha Tribunál Distritál Baucau. Kazu hirak ne'e kompostu husi krime violénsia doméstika 11, krime ofensa ba integridade fízika simples 1, krime danu simples 1 no danu agravadu 1, maus tratus ba kónjuje 2, krime inséndiu 1 no krime inestu 1.

Husi kazu 18 ne'e, kazu 17 mak tribunál konklui ona nia prosesu. Kazu 11 kondena ho pena prizaun maibe suspendidu, kazu 3 mak kondena ho multa, kazu 1 kondena ho pena prizaun, kazu 1 absolve no kazu 1 adia tanbá parte sira la marka prezensa iha tribunál.

Husi totál kazu ne'e hatudu katak prevelensia violénsia bazeia ba jéneru^[1] kontinua aumenta husi lora ba lora mesmu Timor Leste iha ona Lei Kontra Violénsia Doméstika.

Iha sumáriu ida ne'e JSMP rejista kazu 15 husi kazu 18 mak involve krime violénsia bazeia ba jéneru. Ne'e inklui violénsia doméstika ho natureza ofensa simples hasoru integridade fízika simples, maus tratus ba kónjeju no krime inestu.

JSMP rekoñese katak iha progresu ba nivel kondenasaun ba kazu krime inestu sira, maibe JSMP kontinua preokupa ho kazu violénsia doméstika sira ne'ebé tribunál kontinua aplika deit ho suspensaun ba prizaun. Ne'e inklui kazu maus tratus ba kónjuje ne'ebé tuir loloos tenke hetan kondenasaun adekuadamente tuir gravidade husi krime ne'ebé arguidu sira komete.

JSMP fiar katak tribunál iha konviksaun no konsiderasaun rasik antes hakotu pena ba kazu ida-idak maibe hare ba prevalensia kazu violénsia doméstika ne'ebé kontinua aumenta husi tempu ba tempu, JSMP hanoin katak importante atu hare fila fali efetividade husi atribuisaun suspensaun pena prizaun ba kazu violénsia doméstika sira.

Iha kazu inestu, JSMP hanoin katak aleinde hametin kondenasaun ba arguidu sira, estadu prezisa dezenvolve polítika prevensaun no protesaun ne'ebé komprehensivu atu aseguira protesaun no

^[1] Favor lee mós sumáriu kazu violénsia bazeia ba jéneru edisaun Jullu 2013 iha website JSMP: www.jsmp.tl. Parte publikasaun.

asistensia ba vítima sira, liu-liu atu asegura katak krime hanesan ne'e nunca permite iha sociedade modernu no sivilizadu hanesan ohin loron.

Tuir mai deskripsaun sumáriu julgamentu kompletu:

1. Kazu krime ofensa ba integridade física simples ho Nú. 103/Crm.S/2012/TDB

Kompozisaun tribunál : Singular
Juis : Dr. José Gonçalves
Ministériu Públiku : Dr. Pascasio de Rosa Alves
Defeza : Dr. Sergio Paulo Dias Quintas
Konkluzau : Kondena ho pena prizaun fulan 3 suspende ba tinan 1.

Iha 04 Jullu 2013 Tribunál Distritál Baucau hala'o julgamentu ba kazu krime ofensa ba integridade física simples ho natureza violénsia doméstika. Kazu ne'e involve arguidu AS hasoru nia feen JJP, ne'ebé akontese iha 10 Dezembru 2011, iha Viqueque.

Ministériu Públiku akuza katak iha 10 Dezembru 2011, arguidu rasta vítima ba uma laran, tuku dala ida iha vítima nia tilun-hun sorin-karuk no tebe dala ida iha vítima nia kotuk laran. Aktu ne'e rezulta vítima nia tilu-hun no kotuk laran hetan bubu no moras.

Kazu ne'e akontese tanbá arguidu husu osan restu ne'ebé sira deve husi familia atu ba joga karta, maibé vítima la fó, nune'e arguidu halo ofensa hasoru vítima.

Arguidu konfesa totalmente faktus ne'ebé Ministériu Públiku akuza ba nia, maibe nia deklarara katak sira diak malu ona, arepende nia hahalok no sei la halo tan hahalok hanesan iha futuru tantu ba vítima no ema seluk.

Iha alegasaun finál, Ministériu Públiku husu ba tribunál atu aplika pena multa ba arguidu atu bele muda nia atitude iha futuru. Entertantu defeza husu ba tribunál atu fó kastigu ne'ebé kman tanbá arguidu kolabora diak ho tribunál hodi deskobre verdade.

Kazu ne'e konklui iha 11 Jullu 2013. Tribunál konvensidu katak faktu hotu-hotu provadu, maibé konsidera katak arguidu kolabora ho tribunál no kondisaun ekonomia arguidu ne'ebé la favoravel, tanbá ne'e, tribunál kondena arguidu ho pena prizaun fulan 3 suspende ba tinan 1.

2. Kazu krime danu simples ho Nú. 186/Crm.S/2012/TDB

Kompozisaun tribunál : Singular
Juis : Dr. José Gonçalves
Ministériu Públiku : Dr. Pascasio de Rosa Alves
Defeza : Dr. Rui Manuel Guterres
Konkluzau : Absolve arguidu AS no SS no kondena arguidu JMS ho pena prizaun fulan 1 suspende ba tinan 1

Iha 09 Jullu 2013, Tribunál Distritál Baucau prezide julgamentu leitura sentesa ba kazu danu simple ne'ebé involve arguidu nain 3 mak hanesan: Agapito Soares, Satornino da Silva no Justino Martins da Silva hasoru Olinda da Silva.

Bazeia ba prosesu produsaun ba provas ne'ebé hala'o ona antes, tribunál konklui hodi kondena arguidu Justino Martins da Sislva ho pena prizaun fulan 1 suspende ba tinan 1 inklui selu fali vítima nia kadeira ne'ebé nia halo tohar. Iha parte seluk tribunál absolve arguidu Agapito Soares no Satornino da Silva husi akuzasaun Ministeriu Públiku tanbá la iha evidensia sufisiente^[2].

3. Kazu krime ofensa ba integridade física simples ho Nú. 199/Crm.S/2012/TDB

Kompozisaun tribunál : Singular
Juis : Dr. José Gonçalves
Ministériu Públiku : Dr. Pascasio de Rosa Alves
Defeza : Dr. Rui Manuel Guterres
Konkluzau : Kondena ho pena prizaun fulan 3, maibe suspende ba tinan 1.

Iha 9 Jullu 2013, Tribunál Distritál Baucau prezide leitura sentensa no kondena arguidu JBX ho pena prizaun fulan 3 maibe suspende ba tinan 1 tanbá provadu komete krime ofensa ba integridade física simples hasoru nia feen. Kazu ne'e akontese iha Venilale, Distrito Baucau.

Ministériu Públiku akuza katak iha 12 Novembru 2012 arguidu basa dala 2 iha vítima nia hasan no tebe dala ida iha vítima nia kabun. Motivu akontesimentu ba kazu ne'e tanbá arguidu deskonfia nia feen ba mane seluk.

Ministériu Públiku akuza arguidu kontra artigu 145 Kódigu Penál kona-ba ofensa ba integridade física simples konjuga ho artigu 35 Lei Kontra Violénsia Doméstika.

Iha julgamentu arguidu konfesa totalmente faktus sira ne'ebé Ministériu Públiku akuza ba nia no rekoñese katak faktus sira ne'e loos hotu.

Iha alegasaun finál, Ministériu Públiku husu atu kondena arguidu ho pena prizaun fulan 3 no suspende ba tinan 1. Alegasaun ne'e bazeia ba konsiderasaun katak arguidu konfesa faktus, arepende ba nia hahalok no responsavel ba nia familia.

Entertantu defeza husu atu absolve arguidu tanbá sirkunstánsia atenuante sira iha leten ne'ebé hatudu katak arguidu konfesa, arepende, dame malu ona no responsavel ba familia.

4. Kazu krime maus tratus ba kónjuje ho Nú. 54/Crm.C/2013/TDB

Kompozisaun tribunál : Kolektivu
Juis : Dr. Afonso Carmona, Dr José Gonçalves no Dra. Angela Faria Belo
Ministériu Públiku : Dr. Pascasio de Rosa Alves
Defeza : Dr. Rui Manuel Guterres
Konkluzau : Kondena ho pena prizaun tinan 2 fulan 6 no suspende ba tinan 3

Iha 9 Jullu 2013, Tribunál Distritál Baucau halo julgamentu ba kazu krime maus tratus ba kónjuje ne'ebé involve husi arguidu JS hasoru nia kónjuje. kazu ne'e akontese iha Distritu Viqueque.

^[2] Atu kumpriende kompletu kona-ba kazu ne'e, favor hare Sumáriu Julgamentu Kazu Tribunál Distritál Baucau" edisaun Juñu 2013. Iha edisaun ne'e deskreve kona-ba deklarasaun arguidu no depoimentu vítima no testamuña sira iha jsmp nia website www.jsmp.tl. Parte publikasaun.

Ministériu Públiku akuza katak iha 5 Juñu 2012, arguidu basa dala rua iha vítima nia hasan loos no dulas vítima nia liman loos. Aktu ne'e rezulta vítima nia liman naksalak no tenke ba halao tratamentu iha Óspital Baucau.

Depoisde sira diak malu, iha 19 Outobru 2012, arguidu kontinua fali tuku iha vítima nia oin to'o vítima nia oin hetan kanek no matan laran hetan ran.

Relasiona ho aktu hirak ne'e Ministériu Públiku akuza kontra artigu 154 Kódigu Pénal kona-ba krime maus tratus ba kónjuje konjuga ho artigu 35 Lei Kontra Violénsia doméstika.

Iha audiénsia julgamentu arguidu konfesa katak faktu sira ne'e loos hotu, maibe manifesta nia arepende no deklarata katak sei la halo tan hahalok hanesan iha futuru.

Iha alegasaun finál, Ministériu Públiku husu ba tribunál atu kondena arguidu ho pena prizaun tinan 4 tanbá faktus hotu-hotu provadu.

Defeza husu ba tribunál atu hatun pena ne'ebé Ministériu Públiku alega tanbá arguidu kolabora diak ho tribunál hodi deskobre verdade no nu'udar responsavel únika ba nia familia.

Kazu ne'e konklui iha 24 Jullu 2013 tuku 10:00 dadersan. Bazeia prosesu ne'ebé hala'o ona tribunál konvensidu katak arguidu provadu komete krime maus tratus ba kónjuje hasoru nia feen. Mesmu nune'e, tanbá arguidu kolabora ho tribunál, hatudu nia arependementu no responsavel ba familia, tribunál konklui hodi kondena arguidu ho pena prizaun tinan 2 fulan 6 maibe suspende ba tinan 3. Tribunál mós kondena arguidu selu kustu judisiál hamutuk \$. 30.00.

5. Kazu krime inséndiu ho Nú. 159/Crm.C/2011/TDB.

Kompozisaun tribunál	: Kolektivu ne'ebé representa husi
Juis	: Dr. Afónso Carmona
Ministériu Públiku	: Dr. Pascasio de Rosa Alves
Defeza	: Dr. Rui Manuel Guterres
Konkluzau	: Absolve

Iha 09 Jullu 2013 Tribunál Distritál Baucau prezide leitura akordaun ba kazu krime inséndiu (sunu uma) ne'ebé involve arguidu Filomino Maia Gusmão hasoru vítima José da Costa Viegas no Mariano da Costa Viegas, iha Sub-distritu Vemasse, Distritu Baucau.

Ministériu Públiku akuza katak iha 5 Agostu 2011, arguidu hodi eskeru gas ida sunu vítima sira nia uma. Aktu ne'e ikus-mai rezulta uma 2 ahi han no sasan sira iha uma laran la konsege salva no hamosu prejuizu ba vítima sira maisumenus US\$. 5000.00.

Relasiona ho aktu ne'e, Ministériu Públiku akuza kontra artigu 263 Kódigu Penál kona-ba krime inséndiu.

Iha julgamentu arguidu nega faktus ne'ebé Ministériu Públiku akuza ba nia. Arguidu deklarata katak vítima no polisia sira ne'ebé servisu iha Sub-distritu Vemasee akuza nia tanbá arguidu nu'udar membru PSHT. Tanbá kazu sunu uma ne'e akontese depoisde konfróntasaun entre artemarsiais *Persaudaraan Setia Hati Terate* (PSHT) no *Ikatan Kera Sakti* (IKS).

Vítima MCV no testamuña JCF deklara ba tribunál katak sira la haree sé mak sunu sira nia uma maibé ema sira ne'ebé mai sunu uma ne'e ho farda/atributu PSHT nian.

Iha alegasaun finál, Ministériu Públiku husu ba tribunál atu absolve arguidu husi kazu ne'e tanbá durante julgamentu, la konsege produs faktus ruma hodi kondena arguidu.

Defeza mos husu tribunál atu absolve arguidu tanbá razaun no konsiderasaun hanesan ho saida mak Ministeriu Públiku apresenta.

Bazeia ba faktu sira ne'ebé produz durante julgamentu tribunál konklui kazu ne'e hodi absolve arguidu tanbá la iha evidensia sufiseinte atu kondena arguidu.

6. Kazu krime ofensa ba integridade física simples ho Nú. 153/Crm.S/2011/TDB

Kompozisaun tribunál : Singular

Juis : Dr. José Gonçalves

Ministériu Públiku : Dr. Pascasio de Rosa Alves

Defeza : Dr. Rui Manuel Guterres

Konkluzau : Kondena arguidu ho pena prizaun fulan 6 suspende ba tinan 1.

Tuir mai iha 09 Jullu 2013, Tribunál Distritál Baucau prezide julgamentu leitura sentensa ba arguidu FF ne'ebé alegadu komete ofensa ba integridade física simples ho natureza violénsia doméstika hasoru nia feen. Kazu ne'e akontese iha 17 Juñu 2010, iha Distritu Baucau.

Iha julgamentu, tribunál konsidera katak arguidu provadu basa dala 2 iha vítima nia matan fukun, hodi fatuk tuku iha vítima nia hasan no tebe dala ida iha vítima nia kotuk laran.

Mesmu nune'e, tribunál mos konsidera sirkunstánsia atenuantes sira hanesan arguidu konfesa faktu hotu-hotu, arepende nia hahalok, diak malu ona ho vítima no responsavel ba familia, finálmente tribunál konklui hodi kondena arguidu ho pena prizaun fulan 6 maibe suspende ba tinan 1.

7. Kazu krime ofensa ba integridade física simples ho Nú. 73/Crm.S/2013/TDB

Kompozisaun tribunál : Singular

Juis : Dr. Afónso Carmona

Ministériu Públiku : Dr. Pascasio de Rosa Alves

Defeza : Dr. Rui Manuel Guterres

Konkluzau : Kondena ho pena prizaun fulan 6 susupende ba tinan 1.

Iha 10 Jullu 2013, Tribunál Distritál Baucau hala'ó julgamentu ba kazu krime ofensa ba integridade física simples ho natureza violénsia doméstika ne'ebé involve arguidu JG hasoru nia fen. Kazu ne'e akontese iha 07 Setembru 2012, iha Distritu Viqueque.

Ministériu Públiku akuza katak iha 7 Setembru 2012, tuku 10:00 dadersan vítima bolu arguidu atu ba Aldeia Ratahu, maibé arguidu la koho, nune'e, vítima lori nia oan nain rua mak ba Ratahu. Maibe depois arguidu tuir husi kotuk toman vítima iha mota laran, arguidu hahu tuku dala rua ba iha vítima nia kabas, tebe dala rua iha vítima nia kidan no kaer vítima nia fuuk rasta ba iha rai. Tanbá tauk vítima halai ba uma maibé arguidu lao tuir ba iha uma kontinua tebe no tuku dala barak iha vítima nia isin lolon.

Aktu ne'e kauza vítima sofre bubu iha matan fukun sorin loos no hetan bubu no moras iha isin lolon tomak.

Bazeia ba faktu sira ne'e, Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Arguidu deklara katak faktu sira ne'ebé Ministériu Públiku akuza ba nia ne'e los hotu, maibe deklara katak nia arepende nia hahalok no promete sei la halo tan hahalok hanesan iha futuru.

Iha alegasaun finál, Ministériu Públiku husu ba tribunál atu kondena arguidu ho pena multa entre \$ 15.00 too 20.00 durante loron 90 no kada loron sei selu ho sentavus \$. 0.50.

Defeza husu ba tribunál atu aplika pena ne'ebé kmaan ba arguidu bazeia ba sirkustánsia atenuante jerál sira ne'ebé produz durante julgamentu.

Tribunál konklui kazu ne'e iha 24 Jullu 2013 iha tuku 10:00 dadersan. Tribunál prova katak arguidu komete krime ofensa ba integridade fízika simples hasoru vítima.

Tribunál mos konsidera katak arguidu konfesa, arepende nia hahalok no dame malu ona ho vítima. Bazeia ba sirkunstánsia atenuante sira ne'e, tribunál konklui hodi kondena arguidu ho pena prizaun fulan 6, maibe suspende ba iha tinan 1 no kondena mos arguidu hodi selu kustas judisiál hamutuk \$. 20.00.

8. Kazu krime ofensa ba integridade fízika simples ho Nú. 76/Crm.S/2013/TDB

Kompozisaun tribunál : Singular

Juis : Dr. Afónso Carmona

Ministériu Públiku : Dr. Pascasio de Rosa Alves

Defeza : Dr. Rui Manuel Guterres

Konkluziun : Kondena arguidu ho pena prizaun fulan 6 suspende ba tinan 1.

Iha 10 Jullu 2013, Tribunál Distritál Baucau kontinua hala'ó julgamentu ba kazu krime ofensa ba integridade fízika simples ho natureza violénsia doméstika, ne'ebé involve arguidu KHN hasoru nia feen. Kazu ne'e akontese iha 4 Jullu 2012, iha Distritu Viqueque.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples konjuga ho artigu 35 Lei Kontra Violénsia Doméstika.

Ministériu Públiku akuza katak iha 4 Jullu 2012, arguidu hare vítima baku hela sira nia oan, arguidu hakbesik ba iha vítima hadau tiha ai-kafe ne'ebé vítima uza hodi baku sira nia oan no arguidu uja hodi baku ba iha vítima nia isin lolon to'o ai-kafe refere tohar. Aleinde ne'e, arguidu mos dudu vítima too monu ba iha rai, sama vítima nia ain no dulas vítima nia liman. Aktu ne'e kauza vítima sofre bubu iha liman, moras iha kanotak no ain.

Arguidu konfesa totalménte faktus ne'ebé Ministériu Públiku akuza ba nia, arepende nia hahalok no deklara katak sira dame malu ona no sei la halo tan iha futuru.

Iha alegsaun finál, Ministériu Públiku husu ba tribunál atu kondena arguidu ho pena prizaun fulan 3 maibe suspende ba tinan 1.

Alegasaun ne'e bazeia ba konsiderasaun katak faktu hotu-hotu- provadu, maibe tanba arguidu kolabora ho tribunál no kondisaun ekonomia arguidu nian ne'ebé la favoravel atu aplika pena multa.

Entertantu defeza husu ba tribunál atu aplika pena ne'ebé kmaan tanba arguidu kopera ho tribunál no iha sirkunstánsia atenuantes jerál barak iha kazu ne'e.

Kazu ne'e konklui iha 25 Jullu 2013. Iha prosesu ne'e tribunál prova katak arguidu komete duni krime ofensa ba integridade física simples hasoru vítima, maibe tanba konsidera mos sirkunstánsia atenuantes jerál sira iha leten, tribunál konklui hodi kondena arguidu ho pena prizaun fulan 6 no suspende ba tinan 1.

9. Kazu krime danu agravadu ho Nú. 82/Crm.C/2013/TDB

Kompozisaun tribunál : Kolektivu

Juis : Dra. Angela Faria Belo, Dr. Afonso Carmona no Dr José Gonçalves

Ministériu Públiku : Dr. Pascasio de Rosa Alves

Defeza : Dr. Rui Manuel Guterres

Konkluzau : Kondena ho pena multa \$.15.00

Iha 10 Jullu 2013, Tribunál Distritál Baucau halo julgamentu ba arguidu kazu krime danu agravadu ne'ebé akontese iha eskola sekundaria Nino Conis Santana Lospalos. Kazu ne'e involve arguidu FS hasoru Estadu ne'ebé akontese iha 2 Dezembru 2011, iha Lospalos.

Ministériu Públiku akuza katak iha 2 Dezembru 2011, arguidu hodi fatuk tuku rahun tiha vidru janela Administrasaun Eskola Sekundaria Nino Conis Santana Lospalos nian no tuku tan vidru janela eskola nian 2. Kazu ne'e akontese tanba arguidu la pasa eskola wainhira simu envelope ezame final nian.

Ministériu Públiku akuza arguidu kontra artigu 159 Kódigu Penál kona-ba danu agravadu ne'ebé hatuur nia pena abstratu (moldura penál) entre tinan 2 too tinan 8 prizaun.

Arguidu deklarata katak faktu sira ne'e los hotu, maibe arguidu husu ona deskulpa ba Diretór Eskola no selu fali ona vidru foun 3 hodi troka ona vidru ne'ebé nia halo rahun. Arguidu mos deklarata katak arepende nia hahalok.

Iha alegasaun final, Ministériu Públiku husu ba tribunál atu aplika pena minimu ba arguidu bazeia ba sirkunstánsia antenuates sira ne'ebé produz ona durante julgamentu.

Defeza husu ba tribunál atu aplika pena ne'ebé adekua ba arguidu bazeia ba sirkunstánsia sira iha leten.

Prosesu ne'e konklui iha 25 Jullu 2013. Tribunál prova katak arguidu komete krime danu agravadu, maibe bazeia faktu no sirkunstánsia atenuantes sira iha leten, tribunál konklui nia desizaun hodi kondena arguidu ho pena multa \$.15.00. Tribunál mos fiksa pena alternativa loraun 20 prizaun, wainhira arguidu la kompri pena multa ne'e.

10. Kazu krime ofensa ba integridade física simples ho Nú. 207/Crm.S/2012/TDB

Kompozisaun tribunál : Singular
Juis : Dr José Gonçalves
Ministériu Públiku : Dr. Baltazar Ramos
Defeza : Dr. Rui Manuel Guterres
Konkluzau : Kondena ho pena prizaun fulan 5 maibe suspende ba tinan 1.

Iha 11 Julu 2013, Tribunál Distritál Baucau prezide leitura sentensa ba arguidu kazu krime ofensa ba integridade fízika simples ho natureza violénsia doméstika ho pena prizaun fulan 5 no suspende ba tinan 1.

Kazu ne'e involve arguidu FR hasoru nia subriña ne'ebé akontese iha 18 Agostu 2012 iha Venilale, Baucau.

Tribunál prova katak arguidu rasta vítima nia fuk, tuku dala 4 iha vítima nia isin lolon, basa dala tolu iha vítima nia hasan no kesi vítima nia liman ba kotuk.

Iha audiénsia julgamentu, arguidu konfesa faktus hotu-hotu, arepende nia hahalok no deklara katak sira dame malu ona no sei la halo tan iha futuru tantu ba ba vítima ka ba ema seluk.

Bazeia ba faktu no sirkunstánsia atenuantes sira, tribunál konklui hodi kondena arguidu ho pena prizaun fulan 5 maibe suspende ba tinan 1.

11. Kazu krime ofensa ba integridade fízika simples ho Nú. 24/Crm.S/2012/TDB

Kompozisaun tribunál : Singular
Juis : Dr José Gonçalves
Ministériu Públiku : Dr. Pascasio de Rosa Alves
Defeza : Dr. Grigorio de Lima
Konkluzau : Kondena arguidu ho pena prizaun fulan 3 suspende ba tinan 1

Iha 16 Julu 2013, Tribunál Distritál Baucau halo julgamentu ba kazu krime ofensa ba integridade fízika simples ho natureza violénsia doméstika. Kazu ne'e involve arguidu CS hasoru nia feen, ne'ebé akontese iha 30 Novembru 2011, iha Lospalos.

Ministériu Públiku akuza katak, iha 30 Novembru 2011, arguidu diskuti malu ho vítima no tebe dala ida iha vítima nia liman kabun. Aktu ne'e rezulta vítima nia liman moras no bubu. Kazu ne'e akontese tanbá arguidu deskonfia vítima ba mane seluk.

Iha julgamentu arguidu konfesa katak faktus sira ne'e los, maibé nia deklara katak nia tebe tanbá vítima hodi ai-moruk halo nia isin toos hotu. Entertantu iha vítima niniadepoimentu kontinua refórta akuzasaun Ministériu Públiku nian no deklara katak motivu husi akontesementru tanbá arguidu deskonfia vítima ba mane seluk.

Iha alegasaun finál, Ministériu Públiku husu ba tribunál atu aplika pena prizaun tinan 1 no sususpende ba iha tinan 1. Iha parte seluk defeza husu ba tribunál atu aplika pena ne'ebé kmaan ba nia kliente.

Kazu ne'e konklui iha 31 Jullu 2013. Tribunál konsidera katak faktu hotu-hotu provadu, maibé tanbá arguidu kolabora ho tribunál hodi deskobre verdade, arepende ba nia hahalok no responsavel ba familia, tribunál konklui kondena arguidu ho pena prizaun fulan 3 maibe suspende ba iha tinan 1.

12. Kazu krime ofensa ba integridade fizika simples ho Nú. 30/Crm.S/2013/TDB

Kompozisaun tribunál : Singular
Juis : Dr José Gonçalves
Ministériu Públiku : Dr. Pascasio de Rosa Alves
Defeza : Dr. Grigorio de Lima
Konkluzau : Adia

Iha 16 Jullu 2013, Tribunál Distritál Baucau adia julgamentu ba kazu krime ofensa ba integridade fizika simples ho natureza violénsia domestika ne'ebé involve arguidu BS hasoru nia feen. Kazu ne'e akontese iha 17 Marsu 2011, iha Distritu Manatutu.

Kazu ne'e adia tanbá arguidu no vítima la marka prezensa. Tanbá ne'e tribunál marka fali agenda julgamentu tuir mai iha 19 Novembru 2013.

13. Kazu krime violasaun ho agravasaun ho Nú. 97/Crm.C/2013/TDB

Kompozisaun tribunál : Kolektivu
Juis : Dra. Angela Faria Belo, Dr José Gonçalves no Dr. Afónso Carmona
Ministériu Públiku : Dr. Baltazar Ramos
Defeza : Dr. Grigorio de Lima
Konkluzau : Kondena arguidu ho pena prizaun tinan 18

Iha 17 Jullu 2013, Tribunál Distritál Baucau halo julgamentu ba arguidu AAF ne'ebé pratika krime violasaun seksuál hasoru nia oan rasik. Kazu ne'e akontese iha 28 Novembru 2012 iha Distritu Baucau.

Ministériu Públiku akuza arguidu kontra artigu 172 Kódigu Penál kona-ba violasaun kónjuga ho 173 Kódigu Penál kona-ba agravasaun.

Tanbá kazu ne'e nia natureza involve morál públiku no menór, audiénsia julgamentu taka ba públiku. Prosesu hafoin konklui iha 31 Jullu 2013 no tribunál konsidera katak arguidu provadu pratika violasaun seksuál dala rua hasoru nia oan rasik iha 28 Novembru 2012 no 26 Dezembru 2012. Bazeia ba faktu provadu sira ne'e tribunál kondena arguidu ho pena prizaun tinan 18.

14. Kazu krime maus tratus ba kónjuje ho Nú. 21/Crm.C/2013/TDB

Kompozisaun tribunál : Kolektivu
Juis : Dra. Angela Faria Belo, Dr. José Gonçalves no Dr. Afónso Carmona
Ministériu Públiku : Dr. Baltazar Ramos
Defeza : Dr. Grigorio de Lima
Konkluzau : Kondena ho pena prizaun tinan 2 fulan 6, maibe suspende ba tinan 2 fulan 6.

Iha 17 Jullu 2013 Tribunál Distritál Baucau, hala'o julgamentu ba kazu krime maus tratus ba kónjuje ne'ebé involve husi arguidu ho inisial FC hasoru nia feen. Kazu ne'e akontese iha 1 no 9 Marsu 2012, iha Distritu Manatutu.

Ministériu Públiku akuza katak iha 1 Marsu 2012, arguidu diskuti malu ho vítima no tuku dala ida iha vítima nia kabas no kauza vítima nia kabas moras. Tuir mai iha 9 Marsu 2012, arguidu hodi fiu eletresidade baku iha vítima nia kotuk laran no ain too hetan bubu no metan. Kazu ne'e akontese tanbá arguidu deskonfia vítima ba mane seluk.

Iha tribunál arguidu deklara katak nia halo duni aktu hirak ne'e, maibe deklara mos katak nia arepende nia hahalok, sira diak malu ona, sei la halo tan iha futuru tantu ba vítima no/ka ba ema seluk.

Iha alegasaun finál, Ministériu Públiku husu ba tribunál atu kondena arguidu ho pena prizaun tinan 1 suspende ba tinan 2. Alegasaun ne'e bazeia ba faktu atenuante sira ne'ebé produz durante julgamentu. Entertantu defeza husu atu absolve arguidu, tanbá arguidu konfesa, arepende, laiha asidente kriminais, dame malu ona ho vítima no responsavel ba familia.

Prosesu ne'e konklui iha 31 Jullu 2013. Iha julgamentu leitura sentensa ne'e, tribunál deskobre katak arguidu provadu prátika krime maus tratus ba kónjuje ne'ebé Ministériu Públiku akuza ba nia.

Mesmu nune'e, tanbá konsidera mos sirkunstánsia atenuante sira iha leten, tribunál ikus-mai kondena arguidu ho pena prizaun tinan 2 fulan 6, maibe suspende ba durasaun hanesan; tinan 2 fulan 6. Tribunál mós kondena arguidu selu kustas judisiáriu \$. 20.00.

15. Kazu krime ofensa ba integridade fízika simples ho Nú. 208/Crm.S/2013/TDB

Kompozisaun tribunál : Singular

Juis : Dr José Gonçalves

Ministériu Públiku : Dr. Baltazar Ramos

Defeza : Dr. Grigorio de Lima

Konkluziun :Kondena ho pena multa \$. 90.00 no indemnizasaun sivil hamutuk \$. 50.00.

Iha 18 Jullu 2013, Tribunál Distritál Baucau hala'o julgamentu ba kazu krime ofensa ba integridade fízika simples ne'ebe involve arguidu BO hasoru vítima AP. Kazu ne'e akontese iha 30 Dezembru 2011, iha Distritu Baucau.

Ministériu Públiku akuza katak iha 30 Dezembru 2011, arguidu tuku dala tolu iha vítima nia oin too hetan bubu no metan.

Kazu ne'e akontese tanbá vítima ho nia kolega sira hamate ahi eletresidade dirasaun arguidu nia uma atu hadia fiu ne'ebé aat.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples.

Arguidu deklara katak faktu ne'ebé akuza nia ne'e balun la los. Arguidu deklara katak nia tuku dala ida deit laos dala tolu. Maibe vítima no testamuña JP deklara katak arguidu tuku vítima dala tolu.

Iha alegasaun finál, Ministériu Públiku husu ba tribunál atu aplika pena prizaun loraun 60 maibé husu atu susbstitui ho pena multa.

Defeza husu ba tribunál atu aplika pena ne'ebé adekua ba nia kliente tanbá arguidu arepende nia hahalok no responsavel ba familia.

Iha 31 Jullu 2013, tribunál konklui kazu ne'e no deskobre katak arguidu provadu komete krime ofensa ba integridade fízika simples hasoru vítima. Tanbá ne'e tribunál kondena arguidu ho pena multa \$.90.00 no sei selu durente loron 90, inklui selu indemnizasaun sivil \$. 50.00 ba vítima.

Tribunál mos fiksa pena alternativu loron 60 prizaun wainhira arguidu la kompri pena multa no indemnizasaun sivil ne'e.

16. Kazu krime ofensa ba integridade fízika simples ho Nú. 60/Crm.S/2013/TDB

Kompozisaun tribunál : Singular
Juis : Dr José Gonçalves
Ministériu Públiku : Dr. Pascasio de Rosa Alves
Defeza : Dr. Sergio Paulo Dias Quintas
Konkluzau : Kondena ho pena multa \$. 45.00

Iha 22 Jullu 2013, Tribunál Distritál Baucau halo julgamentu ba kazu ofensa ba integridade fízika simples ho natureza violénsia doméstika. Kazu ne'e involve arguidu MC hasoru nia feen. ne'ebé akontese iha 29 no 30 Novembru 2010, iha Baucau.

Ministériu Públiku akuza katak iha 29 Novembru 2010, arguidu diskuti malu ho vítima no tuku dala rua iha vítima nia kotuk laran no matan fukun. Tanbá tauk vítima halai ba iha nia inan-aman nia uma.

Tuir mai iha 30 Novembru 2010, bainhira vítima fila husi nia inan-aman nia uma, arguidu baku tan dala ida iha vítima nia ulun, buti vítima nia kakorok no hodi ain-tur fai ba vítima nia kotuk laran. Aktu ne'e rezulta vítima sofre moras no bubu iha ulun, kotuk laran no kakorok.

Ministériu Públiku akuza 145 Kódigu Penál kona-ba krime ofensa ba integridade fízika simples konjuga ho artigu 35 Lei Kontra Violénsia Doméstika.

Iha tribunál arguidu konfesa faktus sira totalmente, arepende nia hahalok, sira diak malu ona no promete sei la halo tan iha futuru.

Iha alegasaun finál, Minsitériu Públiku husu ba tribunál atu kondena arguidu ho pena prizaun tinan 1 no suspende ba tinan 1. Alegasaun ne'e bazeia ba faktu sira hanesan arguidu konfesa, arepende nia hahalok, diak malu ona ho vítima no responsavel ba familia.

Entertantu defeza husu ba tribunál atu kondena arguidu ho pena ne'ebé kmaan tanbá arguidu kolabora diak ho tribunál, dame malu ona ho vítima no laiha antesidente kriminál.

Hafoin rona tiha alegasaun husi partes sira, tribunál konklui katak arguidu provadu komete krime ofensa ba integridade fízika simples hasoru nia feen.

Tanbá ne'e, tribunál kondena arguidu ho pena multa \$. 45.00 no sei selu durante loron 90 nia laran. Tribunál mos fiksa pena alternativa loron 60 wainhira arguidu la kompri pena multa ne'e.

17. Kazu krime ofensa ba integridade fízika simples ho Nú. 41/Crm.S/2013/TDB

Kompozisaun tribunál : Singular
Juis : Dr José Gonçalves
Ministériu Públiku : Dr. Baltazar Ramos
Defeza : Dr. Grigorio de Lima
Konkluzau : Kondena ho pena prizaun fulan 3 suspende ba tinan 1

Iha 22 Jullu 2013, Tribunál Distritál Baucau julga arguidu MS ne'ebé prátika krime ofensa ba integridade fízika simples ho natureza violénsia doméstika hasoru nia feen. Kazu ne'e akontese iha 3 Jeneiru 2012, iha Lautem.

Ministériu Públiku akuza katak iha 3 Janeiru 2012, arguidu ho katana taa vítima nia ulun no resulta vítima sofre kanek no bubu. Kazu ne'e akontese tanbá arguidu deskonfia vítima ba mane seluk.

Iha tribunál deklara no rekoñese katak faktu sira los hotu, arepende nia hahalok no deklara katak sei la halo tab iha futuru.

Iha alegasaun finál, Ministériu Públiku husu ba tribunál atu kondena arguidu ho pena prizaun fulan 3 maibe suspende ba tinan 1.

Enkuantu defeza husu ba tribunál atu kondena arguidu ho pena ne'ebé kmaan tanbá arguidu kolabora diak ho tribunál, arepende ba nia hahalok no responsabiliza ba familia.

Tribunál konkluí prosesu ne'e iha 31 Jullu 2013, tribunál prova katak faktu hotu-hotu provadu. Tanbá ne'e kondena arguidu ho pena prizaun fulan 3 suspende ba iha tinan 1 iha liur.

18. Kazu krime ofensa baintegridade fízika simples ho Nú. 62/Crm.S/2013/TDB

Kompozisaun tribunál : Singular
Juis : Dra. Angela Faria Belo
Ministériu Públiku : Dr. Pascasio de Rosa Alves
Defeza : Dr. Marino da Cruz de Jesus no Dra. Elvira Maria da Costa husi ALFeLa
Konkluzau : Kondena pena prizaun fulan 4 suspende ba tinan 1.

Iha 24 Jullu 2013, Tribunál Distritál Baucau realiza julgamentu ba kazu krime ofensa ba integridade fízika simples ho natureza violénsia doméstika. Kazu ne'e involve arguida SC hasoru nia laen ne'ebé akontese iha 22 Jullu 2012, iha Distritu Viqueque.

Ministériu Públiku akuza katak, iha 22 Jullu 2012, arguida pratika krime ofensa ba integridade fízika simples ho natureza violénsia doméstika hasoru nia laen. Aktu ne'e resulta vítima sofre kanek iha liman no bubu no moras iha kotuk laran no tilun.

Arguida deklara katak faktu sira ne'e los hotu maibe tanbá vítima insulta arguida. Maibe arguida deklara katak nia arepende nia hahalok, sira dame malu ona no promete sei la halo tan iha futuru.

Iha alegasaun finál, Ministériu Públiku husu ba tribunál atu kondena arguida ho pena prizaun fulan 6 maibe suspende ba tinan 1 ho konsiderasaun ba sirkunstansia atenuante sira ne'ebé asociadu ho krime ne'e.

Defeza husu ba tribunál atu kondena arguida ho pena admoestasaun tanbá pena ne'e mak serve atu aplika ba arguida.

Tribunál konklui katak arguida provadu komete krime ofensa ba integridade fízika hasoru nia laen. Mesmu nune'e, konsidera mos arguida kolabora ho tribunál, sira dame malu ona, foin primeiraves mai hatan iha tribunál, tribunál konklui kondena arguida ho pena prizaun fulan 4 maibe suspende ba tinan 1. Tribunál mos kondena arguida selu kustas judisiál \$ 10.00.

Atu hetan infórmasaun kle'an liután favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

info@jsmp.minihub.org

Telefóne: 3323883|77295795 Website:

www.jsmp.tl

Facebook: www.facebook.com/timorleste.jsmp

Twitter: @JSMPtl